

18/08/1998

2,500 sertai persembahan kesenian KL '98

LEBIH 2,500 peserta terbabit dalam persembahan kesenian dan kebudayaan untuk upacara pembukaan dan penutup Kuala Lumpur 1998 (KL '98) - Sukan Komanwel XVI di Stadium Nasional, Kompleks Sukan Bukit Jalil pada 11 dan 21 September ini.

Kira-kira 1,500 dari jumlah keseluruhan itu adalah pelajar sekolah rendah dan menengah sekitar Lembah Klang berserta dengan 10 guru pengiring.

Di samping itu, upacara pembukaan dan penutup KL '98 turut menyaksikan pembabitan 300 guru pelatih dari Maktab Perguruan Seri Kota (MPSK), Maktab Perguruan Teknik dan Institut Bahasa.

Ketua Penolong Pengarah Panggung Negara, Mohamed Juhari Shaarani, berkata kumpulan profesional bagi persembahan tarian pula terdiri dari 200 peserta secara keseluruhannya.

Menurutnya, pihaknya menghantar 60 penari residen untuk menyertai kedua-dua upacara itu manakala selebihnya adalah dari gabungan penari Perbadanan Muzium Selangor, Dewan Bandaraya Kuala Lumpur (DBKL), Majlis Perbandaran Petaling Jaya (MPPJ) dan beberapa kumpulan penari profesional.

Katanya lagi, persembahan tarian dikawal selia Pengarah Kareografi Kebudayaan Upacara Pembukaan dan Penutup KL '98 (SKUPP KL '98), Dr Ghouse Nasaruddin dibantu Sharifah Mahani Syed Kassim bersama Ahmad Omar, selain kareografer profesional seperti Maziah Omar, Shuhaimi Maji, Mahmud Ibrahim, Joseph Gonzales serta Michelle Wong.

"Persembahan muzik pula diketuai Pengarah Muzik SKUPP KL '98, Johari Salleh dibantu Suhaimi Mohd Zain (Pak Ngah).

"Kira-kira 150 pemuzik terbabit. Mereka daripada gabungan Orkestra Simfoni Kebangsaan (OSK), Orkestra DBKL dan Kumpulan Budaya Negara.

"Di samping itu, persembahan muzik turut membabitkan kira-kira 150 penyanyi koir dari Koir Kebangsaan dan Maktab Perguruan Ilmu Khas," katanya kepada Puspria, semalam.

Muhammed Juhari berkata, enam penyanyi popular tanah air turut terbabit dalam kedua-dua upacara itu.

Katanya, mereka adalah Siti Nurhaliza, Noraniza Idris, Anuar Zain, Roy, Jamal Abdillah dan Jay Jay.

"Ada dua lagi penyanyi keturunan India dan Cina membuat persembahan. Tapi, belum dapat pengesahan lagi.

"Artis yang terpilih tidak akan menyanyikan lagu popular mereka, sebaliknya lagu berunsur kebudayaan dan kesenian tempatan hasil gubahan semula Pak Ngah. Antaranya lagu Dondang Sayang dan Dia Datang.

"Mereka juga akan menyanyikan lagu tema rasmi KL '98, Forever As One (Bersatu Selamanya) diketuai Roy, selain diiringi kumpulan koir," katanya.

Perdana Menteri, Datuk Seri Dr Mahathir Mohamad dijadualkan menonton preliu persembahan untuk kedua-dua upacara itu pada jam 8 malam, 20 Ogos ini di Stadium Nasional, Kompleks Sukan Bukit Jalil.

(END)